

思君久不見願言有所遺貧交無金玉徒倚空庭際  
灼灼盆內花芳莖擢青翠攀枝試攬取馨香拂袖至  
中有文采光絢若流霞被凡卉何可並實爲王者貴  
開緘細什襲將以爲子佩小草何足珍聊以資同氣  
臨風佇有俟將以鴻鴈使

潛蚪小草卷之四

閩汀寧化鶴臯劉文賢以從氏訂

述懷致陳明府厚堂同年二首

有序

余自辛卯之歲臥疾閒居困於家食厚堂同  
年以古道相與其後邑父母皆雅承眷注酬  
答旣多篇什累累然大率庚癸之呼耳本不  
欲錄存而仍之者亦以見一時困厄而諸君  
子同袍念切之意不可忘也稿中京省郡縣



暨同人投贈之作亦多近此嗟乎東籬乞食

一詩其不爲大雅所嗤者幾何哉

芳桂當年各一枝

用義山句

鳳門官馬最先馳早飛雙鳥來天末頻種千花繞

路岐輿誦近傳驅虎檄

邑嘗有虎患君至檄於廟射得之

凱歌

新擬射鵰詞

西師凱旋歌其近作也

幽居悵望光風久要

得登堂轉自疑

龍劍銷沉又幾年柴門一卧老風烟病如張籍

空留賦貧甚顏回早廢田枯槁徒憐高士節吹

噓端賴使君賢應知我士無饑餓况是同袍更

愴然

述懷旋得和章兼致秬米洋錢之惠奉酬一首

瓊田嘉粟海南金一紙官函鶴使勤數米暫分三釜

食開械全異五銖文高情遠薄天邊日佳句新摘卷

上雲舒向茆簷春正靚滿庭花草作芳芬

再得和章仍次前韻一首



霜毫玉版麗兼金官廨閒紆運甕勤再把篇章驚此  
日力追風雅蔚斯文詞翻瀚海千尋浪氣壓巫山一  
片雲却愧錦囊蕭索甚幾回傾耳數清芬

送陳厚堂還任歸化

治譜兼携綵筆遊琴臺花柳恣雕鏤恩膏暫沛纔暮  
月風雅長存此一瓊篋底烟雲他日憶筵前冠蓋幾  
人留袁安已後難高卧愁對春庭雪未收

次韻奉和吳孝廉涵碧四十生日述懷

人生三立德爲一曰言與功德所出君子以故無敢  
逸於乎咄哉悲往日長繩不繫中天輪一株偃蹇空  
羅畢昔余幼服初有行風車雨馬恣超軼靈氛爲占  
汝其吉周遊上下任所必丹山云越巨海涉悵望前  
修心爲怵柴門一閉萬事非歲月荒荒坐淪失鯢鵬  
斥鷃安所率抵掌書空訊蒙漆委身齊物竟無術痛  
哭春華怨秋實牀頭一卷起呼兒獨倚寒牕聽秋蟀  
佳人遠舉千峰崢欲折瑤華致相詰陽阿窈窕鏡臺



高幾度臨粧細梳櫛

陳同年生日十首

家在江南第一州雲間二陸少同遊天邊月色

遙相望兩度花開白下秋

鳳門携手共披襟鴈羽高飛出

上林却把一壺春水去三山隨處作蒼霖

君與弟  
梧溪先

後捷鄉闈同會試京師桐溪  
成進士官部曹君出就長令

鼎耳何嫌試一鮮謳歌到處沸林泉山城路繞

龍湖近得迂仙鳧又幾年

牧童酣卧隴頭雲纔下車來早有聞一檄驟令

哮虎遠邑人爭誦鱣魚文

邑有虎患君檄  
於廟射得之

臬事何勞作鉅筭高懸明鏡正當中政庭每日

傳餐晚吏散人歸燭影紅

水竟無傷火不然皂衣長掛漢蒲鞭東隣誰做

刑書鑄獮豕童牛亦可憐

詩卷仍消案牘間知君才調久難攀臨文更作



金針度昕鼓時聞講院還

破格尤憐禮分殊琴臺春暖士于于龍門宴裡  
冠纓集一曲驅歌綵幣俱

郭外千村社酒香家家擊鼓賽犧羊玉堂正舉

南山爵兕獻豐年誦一章

紅錦排連十二屏一觴同上老人星階前笑指

南飛鶴爲愛晨昏尙在庭

時君之長君  
比上謁選

贈黎生錦昭三十

俊翮高飛翰墨場十年前已擅詞章詩成錦綺思偏  
麗筆落烟雲興轉狂倒屣盡知徐孺子彈冠爭擬謝  
中郎瞳瞳初日人方壯正是扶桑頂上光

代子星高謝厚堂同年兼送北上引

見之行三十四韻

有序

厚堂蒞吾寧高時八歲以同年子承簡召試

以聯句器異之錫文房四寶每賓朋讌會高

必與夜歸則設燭命輿從以僕一時里閭咸



漢書卷八  
卷四  
五  
嘆以爲何禮意之勤如此也明年厚堂北上  
賦此以謝

祖道憑他日沾恩自去年出門初教讓入塾正  
臨編四始分詩義三才訪易詮孔文方卒業戴  
記未終篇魚魯粗猶辨銀根誤恐沿尙應慙典  
謁何敢望周旋驟托龍門末遙瞻馬帳前喬林  
棲薄植濬海注蒙泉父黨容操几孫行得比肩  
握衣還拜母命席屢登筵月榭歌鐘遂花庭舞

袖翩翬肴烝匕棘曲酒送杯船座盡簪纓列人  
皆劍帶懸翻疑童子益得荷鉅公憐厚幣仍紛  
若深心更隱然雙槭明玉版重繭麗松烟詎解  
霜毫構還期鐵硯穿燕歸頻撤燭僕從屢揚鞭  
盛事賓朋詫高風里閑傳光輝長攬擷歲月一  
推遷忽聽驪歌動欣聞

鳳敕宣

虞廷方考績周計早題箋首辟宜京兆交推合



雙鳬飛向月一鶴起冲天花事留餘韻琴聲剩  
故絃民情方惓惓士望愈拳拳况值垂青久躬  
承保未先後車叨繾綣坐記流連誓有徵衷  
激爭忘別緒牽燕雲遙縹緲汀樹近綿延公往  
誠嘉只余居尙勉焉何年噓鯉浪指日躍龍淵  
荏苒申良晤殷勤溯舊緣木瓜堪三復重到畫  
堂邊

代舍弟以雲送陳同年報最北上

卧轍同深此日情幾年賓館荷逢迎但懸一榻慙無  
似長繫雙珠感未平劍水橫流春岸濶燕山遙指曉  
雲輕應知治行宜三輔空牘餘花滿故城

寄懷王敬襄同年兼謝近貺

敬襄司鐸鰲峯余  
子余弟皆自署回

蹬足高空久離羣一官鄰近喜聞君宏開馬帳千人  
席大起鰲峯五色文故誼相通莞子弟新情遙往托  
烟雲歸裝忽訝來簞笥頓作賓厨十日芬

東楊明府

廷理

自歸化來宰吾寧二首



駿烈高持衛霍資

明府之先人以軍功提督軍門名載國史

早窺學海

攫蛟螭天邊價重金三品日下芳生桂一枝崛起長

風颯壯浪却教霖雨暫敷舊桑麻百里明溪地

明溪歸化

號遙抱清琴此更移

望烏瞻裘驟有人問公何以荅斯民大敷里鼓纔三月遍浹衢歌已十旬張弛自應殊補綴吹噓端不異沉淪蓬門一向幽棲久試拂松杉及好春

復齋伯兄哀詞

何斯行之勇決兮竟長逝而不疑軼風馬以疾驅兮  
邇雲路以高馳內不惟之再三兮外不叅以人謀不  
訕日以戒且兮僕夫亦不少諮方飲食以宴樂兮旋  
釋筯以長辭盧扁悔其不察兮史巫紛以無爲越初  
旬之五日兮逾中浣之八晨戚里駭其來詢兮家人  
疑而未信既未聞夫後命兮又不少申其情懷抱遙  
情以孤往兮惜莫知其故彼天宇之寥廓兮萬物咸  
樂以熙熙豈世路之坦平兮君獨以爲嶮巇非斯人



吾誰與兮君何遽謝夫塵寰孰歎而孰欣兮何所見  
而遽然維斯人之素履兮厲余懷以忠信不少屈已  
以徇人兮要無取夫脂潤勿岐嶷以多敏兮學博聞  
而強識中迂道以迥邐兮豈一衿遂售其素志昔余  
家之鼎盛兮余考蹶起以超倫懿修文以砥行兮爰  
偕仲季以彬彬余兄弟之閭薄兮學箕裘而有造各  
先後之踵武兮慕高塵以遠到何時運之偃蹇兮遽  
罹余以不祥余考既抱璞以斃忽兮仲父繼以淪亡

曰老成其代往兮少壯又伏而未翔家道棘其孔艱  
兮分食清白以滋傷重戚嗟以鰥吾弟兮余又櫻夫劇  
疾鳴琴悲其劍咽兮卷軸亦爲之抑鬱方黽勉以需  
時兮曰歲暮其春陽期艱貞以共濟兮度兄力其素  
強夫何一往兮忍余而不顧方擔荷忽弛肩兮若欣  
然釋其重負豈畏難而苟安兮非夫人之素謂事終  
不可爲兮又烏知天人之數嗟嗟遙夜兮破鏡以長  
離一子方力食兮二女亦猶未歸前修孰勉兮後望



何托君不告余以所之兮吾將上下而誰索余固知  
死生之一致兮獨奈何吾兄弟之情矧余之相依兮  
又獨有其生平昔余之櫻疾兮杜門數載塊幽獨以  
嘿嘿兮孰愁思之可解仲旣多戶外之屨兮季又携  
琴以他適抱形影以相弔兮獨兄與吾爲晨夕夏揮  
箴以交風兮冬圍爐以分炭憶中庭之坐論兮夜常  
至於叅半自兄之去兮此景不可以再撫丹漆之在  
殯兮儼猶聞其警欬北風之淒厲兮總帷淅瀝以生  
寒何昔日之覩縷兮今忽聞寂以無言嗟嗟宇宙兮  
人生已感往者莫挽兮來者何續將達觀以齊物兮  
化難一洵彼鄉之可懷兮又何樂此之忽忽苟天命  
之有然兮吾將携手以俱逸

贈陳世兄受庭閒居別墅五首時尊人原堂同

年報最北上

數畝亭臺地經年水竹居官聲循考上仙眷沐公餘  
鶴借三珠樹琴依四壁書開軒容洒掃公子正如如



仕宦傳家早晨昏愛日長暫停毛義檄勤上杜詩堂  
別館宜歌嘯閒居迪吉康花封多勝蹟此地最非常  
近野仍棲郭于郊已在田池空涵牖戶樓迴軼風烟  
遠浦斜陽外連山曉霧邊卷簾方極目花樹更嫣然  
暑院荷風逼秋庭桂月侵棋聲聞竹外笛吹入松陰  
酒熟酣新戰詩狂動遠吹望雲殊未已佳興倍清深  
五馬傳將近雙魚訊有因流鶯催返旆芳草撲征塵  
共擬萊衣舞遙瞻綵服新民風知最久洗盞細披陳

夔如五十贈旬句

短髻驚心各自憐牀頭擊劍剩寒烟十年以長吾如  
此一事無成子亦然蓬矢欲懸空掩袖菊花仍放且  
開筵樽前有酒休回顧憑到中山深處眠

候陳同年北上回任候陞二首

問訊燕鴻久闕然檐車飛賁五雲邊春生

便殿

溫綸被名記中樞綵筆懸三輔正徵張敞異一方猶



賴魯恭賢思君豈獨幽人宅衢巷謳歌已浹年  
士氣民風藉有爲此邦雖小亦何疑閭閻一見  
猶稱幸帶弁三來更足思蜀郡文章勤拭拂桐  
鄉膏雨細敷施官庭晝永榴花韻正是薰絃解  
愠時

節孝伍母壽詞

伊雲林光祿爲作徵詩啓節母姪偉人携詩見示凡數十首

觸手雲箋五色迷春庭閒讀女貞詩梅花老去冰霜  
盡桂子香生雨露滋吾黨競投珠若貫天心長護玉

無疵幔亭仙酒七旬近爲倩麻姑奉一卮

陳明府慕園新任招飲未赴奉答二首

雲路高飛綵鳳身瓊林宴罷得親民應知謠誦同前  
召共喜絃歌有二陳百里冰霜涵愛日滿城花草蔚  
芳春玉堂歲晚尊疊暇折柬翻憐及野人

檀板金鐘記舊遊病來愁聽暮蟬秋無緣執手容披

豁祇恐登堂悞獻酬推分豈堪鶯作友藏身非但蚓

無求神交每在形骸外一片蓬心早自投



張蘭谷見饋奉荅一首

閉門風雪鎖愁城一紙援書閒道行勁旅重邀三百  
乘全師猶憶八千兵不勝隱忍悲吾輩但覺殷勤愧  
友生爭學於陵陳仲子自甘蠶食更無營

陳同年候陞東越假館葵庄書屋有贈

花竹亭臺一主人錦衣玉佩映清新暫賒東越分符  
日試作南樓倚檻身桐月滿簾詩草靜荷風拂袖酒  
杯頻雲槎早晚應官去得賦閒居又幾旬

歲暮書懷柬陳慕園

梅林霜盡雁飛迴剪綵驚聞歲事催無地登臺羞屢  
避頻年驅鬼怯重來三練肯易塗鴉字一賦難矜倚  
馬才猶喜知音人不遠幾回束帛到蒿萊

邑侯觀風錄士代謝一首

治民先治士士爲民之紀治士先治行行乃士根柢  
何以四教中文實開其始曰言爲心聲文醇行必美  
譬彼草木根英華發其裡賢侯甫下車此意非無以



大榜揭交衢多士拭目視瘖者走相告痿者蹶而起  
踴躍來恐後臨晨集冠履鐫門度風簷舍毫視花暑  
思風發胃臆言泉流頰齒咸懷決射心雕鏤抉骨髓  
金針許親度纖悉刺滿紙刻玉剖其精攻瑕透其底  
如錦濯斯明如金礪於砥花幣何煌煌楮墨亦纍纍  
匪以酬汝文庶曰興行已爰進爾多士誨以所可恃  
經明行亦修化民實爲爾爾多士聽哉尙敬無違是  
黃明府耿菴新任過訪謝病未見荅詩二首兼

述近况

麗藻高驅庾鮑門六龍飛處早銜

恩詩歌周雅

王于邁賦紀虞巡

帝有言作

朕股肱方獻策爲民司牧且乘軒山城遙指松溪日

驟覺川原草木溫

君以  
獻詩賦錄用  
南巡

父老扶節去躍然嗟余塊處獨屯遭何勞竹徑



來雙鳥翻愧蓬門斬一氎剩有文章空覆瓿惟  
餘松菊早歸田蕭條歲月經除夕酒脯猶輸賈

閬仙

六十生日口述

寒崖松老梅花笑吁嗟我生復何道耳目昏塞頭如  
童兩髀無力手難掉憶昔朱顏慷慨時高堂賜酒征  
輪趨一枝丹桂出蓬門萬里青雲指燕徼荆山再別  
風木悲五載鳥庭倚秋照重上金門復幾時越水一

方更飛櫂歸來一病遽闌刪鵬路鵬雲舉如掃回首  
風光六十年壯心未老人非少家人捧几欲稱觴禁  
之不可聊復造豈知此際潛有淚拭之不滴落心竅  
哀哉愁讀蓼莪篇父兮母兮何以報昔聞古人服官  
政五十身已歷津要爲上爲德下爲民當世以稱後  
有耀不然晦迹在山林一金一石豈無效悠悠如我  
賸高眠咄咄書空但長嘯出旣無爲處無似有生如  
此豈云孝蓋曰揚名以顯親撫躬難免悲自悼遐哉



往哲獨何人一卷之書空瑋瑋默觀物化亦既久大  
椿朝槿安足較誓欲以此還太虛邯鄲一夢苦難覺  
樽前此意孰有言老婦致詞由我告兒曹在側盃在  
手何爲鬱鬱傷嘯傲我雖不樂姑聽之終然輾轉難  
自調醉後不覺起掀衣仰天一撲案大叫

王明府東埜遣訊近狀詩以答之二首

削迹檀輪肯自誣一經宛轉爲飢驅無分鳳鴛惟求  
食不別魚龍已合汚此日誰憐君子厄當年曾辨小

人儒青泉白石遙相憶愁對寒山失故吾

躍馬扶桑六轡恬當年志士亦云兼天之厄我憑誰

問命不猶人祇自嫌敝色已正聞歌五袴微才爭擬贈

三緘爲因慨念於氓義得貰冰壺潤一纖

毛明府雲亭飲席口占二絕句

齊樹蒼茫浙水流茂陵一病竟悠悠披襟更坐琴臺  
宴驟覺醇交醉不休

老病何因得自投使君高義撲雲浮迴身却笑侏儒



短翻向羣英會裡遊

送朱松巖蔣湘巖三山之行

見說離亭柳攀條別意生偏驚遲暮客長憶往來情  
後會知何日相思及此行鶯花無限好何處挽雙旌  
戊申臘月望日署中梅花盛開主人置酒邀集

賦詩一章

檻外花開處官庭酒正清飛觴寒乍散刻燭月初明  
素影猶棲鶴芳情已占鶯獨慚何水部東閣擅詩名

迎春日連雨新霽毛明府飲席作

春水春郊春令求野夫占候喚晴鳩經旬霖霖旋銷  
凍遍地吹噓早浣愁陌上游韁思放馬隴邊牧笛欲  
牽牛官庭酒後閒拈句柳色花香繞筆浮

贈湯少府莪亭

酌酒不在多論交不在深繫古有心人未面常虛襟  
何君之於我翕若磁與針聞君英少時猛志邁千尋  
逝欲于霄上高舉結華簪豈意鸞鳳姿翻飛枳棘林



牛刀聊一試秣馬山城陰時值盤錯中簿理不少侵  
維曰官有守聊以佐鳴琴布治不期月有誦忽不禁  
穿屋雀無角食甚鵲有音猶以好士懷物色佩與衿  
柴門迴幽寂時復一介臨愛君美書翰贈我逾雙金  
君才固多妙詩畫字如林優遊退食後染紙何淋淋  
字擬精神骨畫傳草竹禽新詩尤縹緲逸興在遙岑  
時以樽前思發為松下吟余懷願言觀覲面愁啞暗  
慨然念自昔論交已至今歲月無幾何惠愛亦已沉

沉深也

何以答繾綣惟此方寸心汀山與漳水

君調任南靖

道遠心自銜無為在岐路攬袖欲潄潄

戊午春初雷至堂携詩見示奉酬一首

連篇宜付雪兒歌

君贈句也

佳句如君我奈何幸有高文

揚駿烈更聞妙藥起沉疴

君以詩四章見示第一題為翠庭先生作令先祖墓誌銘書後第二

誌銘書後第二題為病後有作

鸞箋觸手詞偏好蠟屐臨春興已多

為喜萼樓憔悴地

其第三題為舍弟翼堂壽序書後

並蒙新翰入吹

哦



伊墨卿員外出守惠州寄贈二首

來

琴鶴飄然一葉舟秀才從古擅風流

東書用東坡語有原

是惠州秀才之句

十年秋政觀民久兩袖春霖作郡遊

刻木幾忘庭有吏賣刀誰謂爾無牛更聞父老

欣扶杖舊網新箝早自休

蝴蝶紛迎五色從羅浮三百露晴峯鷄鳴見日

詩成早月下看花酒到濃子服傳餐頻列鼎臣

哀報

國停銘鐘五寧大雅遙相望覓仗先生溯舊踪

菊邨姪六十

憶舊題詩兩悵然

君五十時余壽以詩有十年以長吾如此一事無成子亦然之句

與君逢甲又開筵身如頑石貧難殺興在清樽老更

憐海市烟雲何漫漫寒巖冰雪亦娟娟好看籬畔梅

花色罄倒金

鐘

一醉眠

徐明府蘭臺再署建安寄懷二首

仍聞飛鳥舊桐鄉卧馳起神馳彼美旁治本當年民有



喜交如吾黨道斯長望雲敢意南金贈折柬惟憑此  
雁將爲報東籬陶處士秋來瘦盡菊花黃

遊子躬承記往年驛雲北上隔風烟爲憐羈客方彈  
鋏猶喜神君正着鞭建水千花憑爛漫蓬門雙鯉極  
纏綿應知冰署開函日舊雨情深一惘然

雷南涯七十

梅花泛酒同年老一樣寒花誰最好問君問我兩自  
知把酒看花共傾倒少小前驅躡後塵當年劍佩各

清新驂驪一騁遽一蹶卧老蓬門七十春猶喜襟懷  
君猶爽還向詩文索欣賞知君定有身後名更勉加  
餐善恬養牽車致慶名亦隨有子聯翩孫亦長而我  
嗟咄不自得起處但覺輸筋力縱有兒曹何以寬沒  
世無稱常惕惕爲君舉酒贈君箋且盡花前醉一眠  
仲兄受廬輓詩

老至死相望終古同一局兄去弟不留相看更何哭  
獨有夙昔心耿耿旋相觸爲憶少小時鴈行同書簾



高堂待則隨燕處恒相逐詩酒有餘歡晨牕夜剪燭  
意謂天倫樂何妨賤金玉嗜好不可極得此願爲足  
皎日正中天悲風生兩塾鶴馭片雲催伯兄起迅速  
此恨常綿綿四隅折一角海水滴爲珠有淚枯難續  
荏苒三十年齒落髮同禿猶喜桑榆間季仍偕仲叔  
三壽比作朋得酒嘗一促老大久異居各有妻子屬  
時聞剝啄聲鄰巷來躑躅開門一握笑少坐罄衷曲  
恍惚少小情至今猶可復俄聞君家堂有鳥集惟鵬

兄去又何央徑往無瞻矚嗟嗟古若今瀕死誰能贖  
如水去其壑如葉脫乎木兄去復何憾太室居可卜  
中有花萼樓伯兮早企目兄至更語伯爲我貯醪醕  
尋當踴躍至開樽同所欲醉起招白雲携手蓬山麓  
含情謂阿季努力加饘粥畱君作碩果歲寒耐清淑

武夷山歌

遙望有作

晴空指點秋雲攢竒峰對面矗巘屹汀山南望  
建水北大氣磅礴無等倫高崖巨嶂一齊下獨



與海勢相盤桓擎雲攫霧風雨濶呼吸日月通  
天闢山流曲曲漱其麓地脈浸灌生奇觀豫章  
千尋不可隋丹砂赤箭紛斑斕靈岩怪異瑞草  
茁津潤天下悅朱顏是中侖儻有神氣世土但  
侈登臨歡崧生嶽降古何謂豈獨風日快遊盤  
天下名山多曠絕泰華以外森林巒嵒崑崙崑  
天半立匡廬卓起青雲端篤生英偉皆可述仰  
止獨覺茲山難天開地闢道脈出考亭一水何

潺湲尋流千載誰與溯躬逢

文治方寬閒山陬沐浴海溼遍豈無磊落生其閒臨

風翹首意何盡幔亭仙掌餘高寒



五